

四庫全書

集部

欽定四庫全書

集部

文忠集卷五十一至
四

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李 巖

謄錄監生_臣任嘉春

欽定四庫全書

文忠集卷五十一 平園續稿十一

宋 周必大 撰

題跋

跋歐陽徹遺事

高宗皇帝即位南京宰輔不思將順求言之美意專爲
身謀殺上書人鎮江陳東少陽撫州歐陽徹德明六飛
南渡亟點時相再贈二人朝奉郎秘閣脩撰王音惻怛

過禹湯之罪已錄孤賜田光於史冊草制者中書舍人
王居正也右丞許崧老既爲哀辭某又抄少陽行狀授
梁君世昌刻之世昌曰德明吾鄉人也其孫瑀嘗哀次
事始里中文士鄧名世亦誌其藏將併刻之按唐韓文
銘死事之臣張徹云嗚呼徹也世慕顧以行子揭揭也
噎啞以爲生子獨割也爲彼不清作玉雪也德明生而
命名與之同爲國捐軀又同是真能希顏慕蘭者先是
郡庠繪晏元獻公曾子固汪信民謝無逸祠於講堂德

明預焉其視沒世名不稱或遺臭萬代者孰得孰失耶
德明弟衡子飛黃壻黃怙皆蒙恩補官飛黃終建安尉
瑀蓋其子也嘉泰壬戌臘月乙亥

跋曾無疑所藏黃魯直晚年帖

右友人曾無疑所藏太史黃公帖其前一幅崇寧癸未
公寓武昌竄宜州十二月赴貶時留與黃州何頡斯舉
者明年二月南過洞庭寄家永州五月初道由桂林題
名於行勛太師榕水閣是月十八日至宜有賃黎秀才

宅子手約今刻石秀峰帖中後六帖皆與融州都監高德脩乙酉九月晦公卒自崇觀以後凡片文隻字禁切甚嚴至炎興間則雖宸翰猶俯同其筆法蓋一弛一張人事也或抑或舉有天道焉觀三代兩漢以來彝器碑刻沉埋蝕泐之後傳寶百世何獨公遺墨與嘉泰壬戌閏臘丁巳

跋何居仁與張斗南序

臨江人何居仁學廣聞多下筆滾滾不休高談雄辨常

屈坐人屢上南宮耄老而終觀送鄉人張孝子序議論
淵源詞采贍蔚胸次筆力可窺一斑其稱張君至矣古
者求忠臣於孝子之門既舉其孝復勉以忠此誨人本
末之序也張舊名楠字南叔後改名斗南而字如初今
監柳州酒稅敏達和易喜從名勝遊予友許凌志伯高
弟也嘉泰壬戌臘月二十一日

跋馮軫所藏五帖

東坡書富文忠公神道碑

富文忠之使邊所謂肅肅王命仲山甫將之也蘇文忠
之翰墨所謂吉甫作誦穆如清風也大雅蒸民茲可無
愧富公孫樞密蘇公猶子侍郎皆顯名卷末抑所謂臧
孫有後於魯者嘉泰癸亥四月戊申

東坡書陶靖節詩

東坡云吾於詩人無所甚好獨淵明詩質而實綺癯而
實腴自曹劉鮑謝李杜諸人皆莫及蓋嘗盡和其詩尤
喜此四篇再三書之嘉泰癸亥四月戊申平園老叟周

某題而歸之馮氏

東坡潁川詩

東坡以元祐六年秋到潁川明年春赴維揚作此詩題曰西湖月夜泛舟今集序以趙德麟餞飲湖上舟中對月爲題是也按公在潁僅半年集中自放魚長韻而下凡六十餘詩歷考坡所至歲月惟潁爲少而留詩反多蓋陳傳道履常趙德麟歐陽叔弼李默適聚于潁故臨別詩云五君從我遊傾瀉出怪珍又中間劉景文特來

送行詩云歐陽趙陳皆我友豈謂夫子駕復迂邇來又
見三黜柳共此煖熱餐羶蘇自注云郡中日與叔弼景
貺履常相從而景文復至不數日柳戚之亦見過賓客
之盛頃所未有乃知攄發妙思羅列於此抑有由也堂
名聚星今古相望使有俗物敗人意如坡所云其能爾
乎馮吳江軫遠示真蹟敬題其後嘉泰癸亥孟夏九日
米元章上呂汲公書

右元祐九年春末改紹興時米元章知雍丘縣上呂汲

公書元章字畫豪逸非以畿令事宰相故加謹楷殆由
切於爲民有莊敬之心心既莊敬字畫隨之此與檄報
鄰縣打回蝗蟲之戲異矣雍丘本杞子國初以名縣嘗
名州云嘉泰癸亥四月戊申

山谷書六一先生古賦

六一居士集共五賦山谷寫其三黃楊疑少作憎蒼蠅
嫌譏刺耳外集別有四賦惟取述夢益因悼亡辭意俱
妙類李太白即嘉泰癸亥四月九日

題趙遜可文卷

揚雄有言事辭稱則經此爲屈原發也自國風雅頌之後能庶幾於此者其離騷乎或推爲經雖曰太過未爲無據也晁補之續楚辭二十卷自宋玉及漢唐至於本朝諸賢辭賦問對歌詩序引之類咸在雖一代英傑盡心力而爲之遂以名世然其原皆出於離騷特體製殊耳予同年進士趙兄彥博字富文仕至權工部侍郎政事文學皆過人而詩禮之訓尤切淳熙中予在西府富

文之孫時逢字遜可年方英妙携葩蜜稿一編爲贄凡
辭賦銘贊傳序及莊周八寓總二十餘篇意高詞古大
抵祖楚辭也予固已駭嘆其不可及後二十年遜可自
尚書郎出帥大藩復示十八賦他文亦十餘篇意益高
詞益古號山窓斐稿屬予訂之予既喜楚辭之有傳又
慶吾同年之有後也昔杜牧作皇諸孫賀集序極道其
歌詩之妙當矣末乃謂賀生二十七年而死使未死少
加以理可以奴僕命騷是何言與此與杜審言屈宋作

衙官之語奚以異大率唐人失之矜誕予無取焉今邈
可年方強仕進脩未艾他日復有如補之者出將擊節
於斯文其附二十卷而傳也必矣予何足以知之嘉泰
三年五月日題

跋楊廷秀對月飲酒辭

韓退之稱柳子厚云玉佩瓊琚大放厥辭蘇子瞻答王
庠書云辭至於達而止矣誠齋此辭可謂樂斯二者嘉
泰三年八月二十日

跋陸務觀送其子龍赴吉州司理詩

吾友陸務觀得李杜之文章居嚴徐之侍從子孫衆多
如王謝壽考康寧如松喬詩能窮人之謗一洗萬古而
空之嘉泰癸亥九月四日

跋劉共甫胡邦衡帖

右劉共甫樞密與胡邦衡資政三帖前二者隆興甲申
共甫守衢邦衡自海道罷歸經過時後一幅淳熙乙未
共甫帥金陵邦衡隨其長子泳守官時也邦衡書二幅

所謂季羔正字者王端朝也時紹興己卯量移在鴈峰
惟知郡帖不知何人視題銜則乾道庚寅歲也最後予
與邦衡書亦乙未歲者鄉人羅克宣次召出以相示今
遠者四十年近則二十九年邦衡父子共甫季羔墓木
皆拱惟予養疾山林王羲之云俯仰之間已爲陳迹况
歲月如是之久乎太息題其後嘉泰癸亥九月戊寅

跋王獻之保母墓碑

銘墓三代已有之薛尚功鍾鼎款識第十六卷載唐開

元四年偃師耕者得比干墓銅槃篆文云右林左泉後
岡前道萬世之寧茲焉是寶蓋古者範銅精巧鏤以爲
器生死皆用自漢錢幣益重銅禁日嚴不宿業於是陶
土堅緻與鐵石等予得光武時梓潼扈君墓甌先叙所
歷之官末云千秋之宅模脫隸書而非鑄也又有章帝
時范君謝君甌銘以四字爲句厥後銅雀之瓦遂可作
甌字亦隱起以此知東漢誌墓初猶用甌久方刻石紹
興中予親見常州宜興邑中斲出靈帝時太尉許馥塚

有碑漫滅惟前百餘字可讀大畧云夫人會稽山陰人
姓劉氏太尉之婦也任昉在梁撰文章緣起乃謂墓誌
始晉殷仲文洪丞相适跋云世傳東漢墓碑皆大隸疑
昉時尚未露見其說良是惜乎洪公不見漢魏也由今
論之自銅易魏自魏斷石愈久愈簡便矣嘉泰癸亥故
友四明沈煥叔晦之子省曾出示越上新拓王獻之保
母墓碑因詳記於後十二月壬寅

丁酉歲恭和內宴御詩草跋

淳熙丁酉九月戊午早赴明慶寺開啟聖節先是有旨
令閣門依倣太宗太平興國二年故事宣宰執侍從正
任內宴觀擊毬午時入東華門過選德殿其後即毬塲
也相對有大堂曰水堂其左爲芙蓉閣右爲凌虛閣至
則分左右朋立班樂作上乘馬來迎駕兩拜上御芙蓉
閣遶城花正開羣臣起居上乘馬擊毬畢下馬再坐皇太子
以下奉觴稱賀上飲訖宣羣臣就坐各賜酒飲醕乃接
盞上臨軒羣臣分侍皇太子乘馬擊毬次左右朋擊屢

傳旨實擊既畢上乘馬歸羣臣少憩幕次移刺宴選德
殿酒五行宣勸者再大畧如景靈宮對御時亦用雜劇
二段第四盞宣示御詩一首明日羣臣皆和進某時爲
翰林學士此其稿也不知臨江貢士劉君昌詩何自得
之後二十八年出以相示俾題其後嘉泰甲子正月辛
巳

跋蘇黃門左筠州施楞嚴標指

蘇文定公以元豐二年己未乞納官贖兄文忠公罪旋

自南京簽判謫監筠州鹽酒稅明年至官又明年四月
僧惟盛剋楞嚴標旨要義十卷成公時年四十三史夫
人四十一其九月卽施十本贈機長老卷末親題名氏
嘉泰甲子筠幕玉牒彥璋南夫得之求誌歲月觀公文
集後二十二年歲在癸未復題此經云十年來漸悟佛
法經歷憂患真心不亂今翻覆熟讀乃知諸佛惠我無
生法忍無漏勝果願心心護持勿令失墜益與頃年求
福田利益之意異矣二月辛丑平園老叟周某某子充書

題文氏雙秀亭詩

此予少年遺廬陵永和鎮文安國者今三十六年矣其
予立方不遠二千里携以相示揚雄少作之悔令威化
鶴之念徒耿耿耳淳熙乙巳十月旦書後二十年再觀
於平園華隱樓嘉泰甲子三月望

跋韓忠獻范文正歐文忠與尹師魯帖

尹師魯素爲韓忠獻王所重此帖可見又于范文正公
義兼師友及論陝西攻守乃與范異是豈以水濟水哉

歐陽文忠公與師魯尤爲道同志合方師魯欲械治劉
滬文忠作諫官奏疏云寧移尹洙不可爲洙曲有黨庇
正指韓范也師魯竟自涇帥徙知晉州尋因仇人上書
謫官而卒至嘉祐中韓公入相始復師魯官錄其子而
歐陽公誌師魯墓亦極口褒美前賢先國事後伸朋友
之誼皆可法也嘉泰甲子三月甲戌

題范文正公帖

右范文正公前一帖慶歷六年正月自邠赴鄧時與龍

圖閣直學士田況書也況知泰州丁父憂仁宗詔起復
又遣內侍持手勅起之不得已乞歸葬訖託邊事求見
泣請終制上惻然許之帥臣得終喪自此始詳載正史
今公既以依道扣聖門告元均復欲讀書涉道而自樂
前賢書問類如此可與識者道難與泛泛不情者言也
後一帖呼提點疑部使者或內外主判差遣學士則帶
館閣無疑族家乃同姓考仁宗實錄及百官表必可得
吳兄弟少年向學試爲披尋此非八十老翁事也嘉泰

甲子三月甲戌

跋趙逢原得母詩卷

高宗皇帝孝通神明宣和皇后歸燕慈寧振古未聞也
風化所覃自親及疎時則有宗室伯深字逢原居吉之
安福縣別母三十年後乃知流落蜀中某少時親見其
迎侍來歸名士如曾端伯及其子子長晁子西程詠之
皆贈以詩後有朝奉郎任紳字公垂東州人靖康之亂
與母相失齋戒禱天者十七年紹興和戎河南來歸徒

步求母而得之奉事十有八年詔擢刪定官又兵部沈
尚書介字德和湖州人宣和間父官濟南生德和而嫁
其所生兵亂莫知存亡紹興末以秘書少監使北方徃
回厚賂驛舍承應人宛轉物色得母所在歸懇荆襄將
帥捐金用間母遂與其異父弟偕來皆奇事也今逢吉
孫豐城主簿希恭出示舊詩予方脩廬陵志當併記所
聞脩史官採擇以彰聖化嘉泰四年四月二十一日

題平園圖後

使臣王思恭昨寫予真求贊因記書對文苑之勞今又
繪平園圖集予詩文于後用意益可嘉也嘉泰甲子端
午日

題宋姓西園詩稿

金華宋姓字茂叔生于紹興壬申年十二月三日卓然
自立爲鄉里先進所知從呂伯恭學其論通鑑貫串不
窮伯恭大奇之紹興改元第進士主筠州高安簿豫章
帥漕王謙仲丘宗卿尤延之鄭舜舉皆待以上客宗卿

使邊以爲書狀官歸循從事郎掾融州秩滿辟廣西監
事司主管官漕張君量胡元之又待以上客蓋其氣象
和平議論堅正明敏足以決事廉勤足以勵俗不幸年
四十餘卒官平時于經史皆究極本原尤工詩篇興寄
殊高遠嘗次陸務觀韵云欲求平易多成拙稍有新奇
却未工得句直須參造化此身何必計窮通胸中所蘊
可見矣其子自適亦佳士示君西園詩稿爲題其後嘉
泰甲子五月乙亥

書曾無疑匹紙

蘇文忠公素慕白樂天之爲人蓋二公文章皆以辭達爲主其忠厚樂施剛直盡言與人有情與物無著亦畧相似樂天爲忠州刺史作東坡種花二詩又有步東坡詩云朝上東坡步夕上東坡步東坡何所愛愛此新成樹文忠公中年謫黃州偶因築室號東坡居士嘗賦八詩其屬意有自來矣後爲從官羨樂天口之不置如云定似香山老居士世緣終淺道根深又云我似樂天君

記取又云出處依稀似樂天其他形於詩者尚多惜乎
閒居二十年之志逮莫能遂黃門公不云乎子瞻之仕
其出入進退猶可考也後之君子其必有以處之矣慶
元己未二月三日友人曾無疑出示匹紙爲書此說

文忠集卷五十一

欽定四庫全書

文忠集卷五十二

平園續稿十二

宋 周必大 撰

序一

傅忠肅公察文集序

二帝三王時人才多出於國子蓋其見聞積習作成有素非如秀民必俟族黨州鄉賓興之然後用也觀舜命夔典樂教胄子曰直而溫寬而栗剛而無虐簡而無傲

及命契爲司徒教民則敬敷五教在寬而已周官大司
樂以樂德教國子曰中和祇庸孝友及司徒以三物教
萬民則置禮樂于六德六行之後其視成材詳畧次第
固有別矣夫子不云乎興於詩立於禮成於樂至於樂
則義精仁熟和順於道德而性成焉故以之事親必孝
事君必忠臨大節必不可奪文其餘力也晉唐以來名
學與監置祭酒若司業皆冠以國子是亦古之遺意歟
本朝世臣巨室前後相望在仁宗時有若獻簡傅公諱

堯俞未冠以進士起家平居號稱長者及事四朝屢歷
言路忘身徇國有不可奪之節遭時遇主致位二府生
都美譽沒保令名遂爲大家其從孫忠肅公諱察年十
有八復踐世科宣和末以吏部郎假宗正廷勞金國賀
正使行及境上會幽燕交兵或勸其歸公不可猝遇幹
里雅布強公使拜公又不可竟握節死之詔贈徽猷閣待
制乾道中追賜今諡其諸子皆以學問猷才翱翔仕途至
孫伯壽文采益高方以直煥章閣按行畿部興念前烈

既編定獻簡公草堂集又哀公遺稿成三卷將傳之四方屬某序其首惟公文務體要詞約而理盡甚類獻簡詩尤溫純諛貫間次險韻愈多而愈工惜乎享年纔三十有七名宦未達高文大冊無自而發其淵源則可考矣竊嘗論之獻簡幸太平無事時止于正言不諱是以爲宋良臣公則不幸將命艱難之際仗節死難遂在忠臣之目要之忠孝大節易地則皆然特所遇不同耳故爲推本帝王之教以及本朝之盛使學士大夫知公世

濟其美不隕其名者如此慶元元年正月

歐陽文忠公年譜後序

文忠公年譜不一惟桐川薛齊誼廬陵孫謙益曾三異
三家爲詳雖用舊例每列其著述考文力之先後然篇
章不容盡載次序寧免疑混如公曾孫建世以告勅宣
劄爲編年尚多差互況餘人乎今參稽衆譜傍採史籍
而取正于公之文凡居士集外集各于目錄題所撰歲
月而闕其不可知者奏議表章之類則隨篇注之定爲

文集一百五十三卷居士集五十卷公所定也故實於

首外集二十五卷次之易童子問三卷

詩本義別行於世外制

集三卷內制集八卷表奏書啟四六集七卷奏議十八

卷雜著述十九卷集古錄跋尾十卷又次之書簡十卷

終焉考公行狀惟闕歸榮集一卷徃徃散在外集更俟

博求別有附錄五卷紀公德業此譜叙出處詞簡而事

粗備覽者當自得之慶元二年二月十五日

元稹六一書缺歸榮集一卷檢他集間有致仕後雜

著數篇遂以其類分寘外集中今得六一當時自編此卷其數正同乃知所分不可易也今以元篇列於總目之後毫髮無遺恨矣嘉泰四年中秋續題

歐陽文忠公集古錄序

右集古錄序成於嘉祐末年其云有卷帙次第無時世先後蓋取多而未已故隨其所得而錄之此公述千卷不以世代爲序之意也又云撮其大要別爲錄目因載夫可與史傳正其闕謬者以傳後學此公述錄目跋尾

之意也至熙寧二年公之子叔弼記其後云公命斐曰
吾跋諸卷之尾者二百九十六篇若撮其大要別爲錄
目則吾未暇斐乃盡發千卷著其大畧自今觀之公序
明言別爲錄目而斐乃記公未暇之語世傳集古跋十
卷四百餘篇而斐乃謂二百九十六篇雖是時公尚無
恙後三年方薨然續跋纔十餘耳不應多踰百篇得非
寫本誤以三百爲二百或斐記乃熙寧之前耶斐又云
爲十卷附跋尾之後今錄目是爲一書乃二十卷不過

列碑石所在及其名氏歲月初無難者何未暇之有是
皆可疑姑以斐所記附公本序之後而自周秦至於五
季皆隨年代爲之序庶幾時世先後秩然不紊間有書
撰出於一手其歲月相邇則類而次之又於每卷之末
備存當時卷帙之次第既以便今亦不失其初云

歐陽文忠公集古錄後序

集古碑千卷每卷碑在前跋在後銜幅用公名印其外
標以紺紙束以縹帶題其幘曰某碑卷第幾皆公親蹟

至今猶有存者按公嘗自云四百餘篇有跋今世所傳本是也其間如唐鄭權碑乃熙寧辛亥歲跋又至明年正月方跋鄧艾碑李德裕山居各詩四月題前漢鴈足鐙銘後數月而公薨殆集錄之絕筆也方崧卿裒聚真蹟刻板廬陵得二百四十餘篇以校集本頗有異同疑真蹟一時所書集本後或改定今於逐篇各注何本若異同不多則以真蹟爲主而以集本所改注其下或繁簡遼絕則兩存之如後漢樊常侍碑真蹟作永壽四年

四月而集本改作二月訪得古碑二月爲是至於以始元爲漢宣帝年號又稱後周大統十六年唐大足二年之類乃公一時筆誤不敢有所更改

集古跋既刻成方得公子叔弼目錄二十卷具列碑之歲月雖朝代僅差一二而紀年先後頗有倒置已具其下

歐陽文忠公集後序

歐陽文忠公集自汴京江浙閩蜀皆有之前輩嘗言公

作文揭之壁間朝夕改定今觀手寫秋聲賦凡數本劉
原父手帖亦至再三而用字徃徃不同故別本尤多後
世傳錄既廣又或以意輕改殆至訛謬不可讀廬陵所
刊抑又甚焉卷帙叢脞畧無統紀私竊病之久欲訂正
而患寡陋未能也會郡人孫謙益老于儒學刻意斯文
承直郎丁朝佐博覽羣書尤長考證于是徧搜舊本傍
采先賢文集與鄉貢進士曾三異等互加編校起紹熙
辛亥春迄慶元丙辰夏成一百五十三卷別爲附錄五

卷可繕寫摸印惟居士集經公決擇篇目數定而參校衆本有增損其詞至百字者有移易後章爲前章者皆已附注其下如正統論吉州學記瀧岡阡表又迴然不同則收實外集自餘去取因革粗有據依或不必存而存之各爲之說列於卷末以釋後人之惑第首尾浩博隨得隨刺歲月差互標注牴牾所不能免其視舊本則有間矣既以補鄉邦之闕亦使學者據舊鑒新思公所以增損移易則雖與公生不同時殆將如升堂避席親

承指授或因是稍悟爲文之法此區區本意也六月已
已前進士周某謹書

劉彥純和陶詩後序

歌詩之作在國則繫其風化在人則繫其性習勤而不
怨憂而不困以至泱泱乎颯颯乎之類識者一聞遺音
不待入國風化固已可知人之文章苟蘊諸中必形諸
外特用力有深淺故下語有工拙爾唐人鮮不能詩雖
體格或不同而各能成其材是無他不強所短而擅焉

不棄所長而畫焉因其性而加之習茲所以名家也歟
安福縣劉君彥純諱承弼紹興丙子乾道戊子兩薦於
鄉既下第即隱西溪淳熙三年邑人舉其節行旌表門
閭常慕五柳先生爲人盡和其詩百篇煥章閣待制楊
公廷秀爲之序盛行於江西而其弟之壻趙伯琢復求
予題其後予告之曰彥純此詩殆得於唐人非得之五
柳也伯琢駭而請其說予曰平澹簡易忘懷仕進彥純
之性也不摳不畫盡吾之才彥純之習也昔魯男子夜

閉戶拒鄰婦婦曰子何不若柳下惠男子曰子與吾皆
幼柳下惠固可吾固不可吾將以吾不可學柳下惠之
可孔子稱其善今吾彥純蓋有得於此信予斯言然後
知淵明春蘭秋菊松風澗水果在彥純破琴斷絃中廷
秀真知音哉慶元二年四月日

元豐懷遇集後序

吏部尚書贈少師王公子發序其西掖制草謂自高祖
晉公曾叔祖魏國文正公以及其身世掌絲綸名集曰

懷遇而不曰榮遇者謙也恭惟太祖太宗削平僭亂勃興文治士生斯時以登畿爲榮而晉公知制誥在乾德之三年至太平興國八年真拜舍人雍熙末出院纔四歲而文正已踐父官蓋淳化二年也至道二年章聖即位乃遷內相父子繼遇明主出風雷之令鼓舞多士縉紳榮之後八十餘歲當元豐六年十月公復紹高曾之業越二年進給事中是時裕陵董正治官文章煥焉可述宣仁哲廟大收人才協成初政潤色之功尤多蓋三

世代言俱接武于兩朝可謂榮也已矣慶元丙辰公曾
孫淹爲廬陵郡丞太守楊侯方得是集而悅之將刻板
布之四方謂某紹興乾道間嘗典斯事俾作後序記其
本末昔官制初行舍人曾南豐也一日除郎御史數十
人公爲都司付制吏部讀而歎曰本原職守爲之訓勅
人人不同咸有新趣而衍裕雅重自成一家予謂欲知
公制詞之美此數言盡之矣豈所謂夫子自道者耶至
於追爵荀况揚雄韓愈三制簡古明粹殆與西漢詔令

相爲表裡嗚呼盛哉集凡七卷制詞四百餘首或疑末
卷它文十八篇不當入集按宋元憲掖垣叢志云中書
因事表狀道釋齋贊蹟語並當制舍人撰近世此例方
廢併書以告來者七月十日

朱新仲舍人文集序

藝之至者不兩能故唐之詩人或畧於文兼之者杜牧
之乎苦心爲詩自其所長至於議論切當世之務制誥
得王言之體賦序碑記未嘗苟作予每讀其書而愛之

恨不與之同時孰知後世揚子雲乃在吾先友中先友
謂誰敷文閣待制桐鄉朱公也公世文儒年二十二登
政和進士第是時人諱言詩公獨沉湎六義思繼作者
南渡以來登館閣掌書命文章浸顯於朝中忤時宰謫
居曲江十有四年昌其詩放厥辭益斥久窮極益自刺
苦於山水間時也迨北歸則詩益老文益奇遂以名家
其子軾等類公遺稿凡四十有四卷將刻而傳之屬予
爲序予謂公於牧之似之者三耽嗜佳句不工不已豈

惟詩哉它文稱是一也仕皆至中書舍人職皆嘗歷史
官以文華國儒者榮之二也牧之出典黃睦池湖四州
公亦守睦宣蘇等郡俱有惠政臨終各自誌其墓三也
過之者亦三公事高宗玉音屢獎其文擢寘從班坐是
被讒而去牧之爵位皆宰相進擬不聞親結主知一也
公壽七十一牧之五十而已二也公之子若孫俱傳其
家學牧之之嗣雖承郎素業無聞焉三也某於公爲年
家子及與公歟而知公詳因序公集併以是補公之家

傳公諱翌字新仲慶元二年九月二十三日具位周某
序

王致君司業文集序

志氣不強不足以言文學問不博不足以言文司業王
君吾能言之志氣強者也學問博者也故其文章贍而
不失之泛嚴而不失之拘議論馳騁于千百載之上而
究極於四方萬里之遠其爲歌詩慷慨憂時而比興存
焉他文閎辯諛貫直欲措諸事業所謂援古證今黼黻

其辭特餘事耳既沒之十九年嗣子中行類遺編成二十卷求予爲序君諱述字致君世家宛丘生十有一歲當建炎戊申北兵破陳爲其所俘轉徙河朔者十年戎馬中編簡蕩然僅得春秋左氏傳班固西漢書晝夜誦之一字不遺和議成間道歸其父尚書公於浙東父母兄弟相見已即提書入太學益從師友盡讀諸子百家日萬餘言遂擢進士第凡中原所親歷平昔所講畫敵已在其目中又從知己視師荆襄然後南北形勝表裡

洞達落筆輒數千言舉天下事如指諸掌孝宗竒之擢御史諫官將行其言旋出爲二千石部刺史而簡注不衰迨淳熙四年爲少司成選迂敵使方嚮於用年六十而卒其所抱負百未一究也予與君家契且舊每悲君之不遇既叙其文復紀其平生大畧如此後有君子爲國惜才者必將歎息於斯焉慶元二年十月十五日具位周某某序

羣玉詩集序

新淦之下有市曰硤江直玉澗口陸行十五里至玉笥山按道書以爲羣玉山第十七太秀法樂洞天又爲第八郁木福地漢武帝時遣使祈禱見白玉笥于壇上以是得名古有宮觀二十餘區以承天宮爲冠在三會峰下本梅福舊壇五代號玉梁觀真宗祥符初賜今名宣和間陞觀爲宮其右白雲齋又登臨之冠也方其盛時聚徒至三百人大觀庚寅不戒於火後雖葺治未復其舊且非傳錄之地故不能與閭阜爭長雄然山川閎麗

仙真雜選則或遇之有宣義郎楊扶圖南著實錄二萬餘言事爲一門王密德升賦詩三百餘篇篇紀一事二君皆邑之名勝其書同成於紹興之二十八年古迹備矣今知宮事楊得清復剌自唐以來詩人題咏附益之凡好事者苟未能一至此山姑視三書猶將神游意想飄飄然起凌雲之志況於出入煙霞遨遊泉石之間哉得清蓋廬陵士族於誠齋待制爲叔姪行作詩有家法求予一言故爲提其要於卷首慶元三年七月某日平園

老叟周某序

蘇文定公遺言後序

記諸善言孝子慈孫門人弟子之任然門弟子非一先
後不齊傳授或不審如元城劉忠定公於本朝故實洞
達談貫無毫釐差而馬永卿錄造薰籠語猶以元豐後
官制爲太祖時官則夫易知者尚爾況言之要德之與
乎蘇文定公晚居許昌造道深矣避禍謝客從有門人亦
罕與言其聞緒論者子孫而止耳然諸子宦遊惟長孫

將作監丞仲滋諱籀年十有四才識卓然侍左右者九年記遺言百餘條未嘗增損一語既老以授其子郎中君許郎中復以授其子道州使君森予嘗與道州同僚故請題其後昔人疑黃樓賦非出公手東坡蓋親爲之辯今公自謂此賦學兩都晚年不復作此工夫之文至和陶擬古九首則明言坡代作識者當自得之又云讀書須學爲文餘事作詩然公詩自工謂儲光羲高處似陶淵明平處似王摩詰而以韓子蒼比之子蒼由是知

名公素不作長短句今漁家傲一篇雖用禪語而句法極高乃知公非不能直不爲耳此皆學者所宜知也惟公道德文章國有史家有集所學在古史所得在經解平生議論復載於此若予者何足以窺其端徒見公善者機而已慶元戊午正月乙卯

楊謹仲詩集序

文章有天分有人力而詩爲甚才高者語新氣和者韻勝此天分也學廣則理暢時習則句熟此人力也二者

全則工偏則不工工則傳不工則不傳古今一也同年
楊謹仲家世文儒才高而氣和於書無不讀於名勝無
不師慕之嗜古如嗜色爲文晝夜不休清江置郡今二
百年二劉三孔以來文風日盛謹仲自少爲先進所推
未第時鄉之英俊爭受業於門名聞四方願交者衆二
千石以下皆尊禮之蓋其行藝俱優而尤喜爲詩本原
乎六義沉酣乎風騷自魏晉隋唐及乎本朝凡以是名
家者徃徃窺其藩籬泝其源流大要則學杜少陵蘇文

忠公故其下筆初而麗中而雅晚而闕肆長篇如江河之
澎湃浩不可當短章如溪澗之漣漪清而可愛間與賓
客酬唱愈多愈奇非所謂天分人力全而不偏者耶諸
孫光祖等既哀成若干首分爲若干卷而門人高第韋
宜州楫又捐俸刻之其傳無疑矣謹仲諱愿五十餘方
入官一爲縣主簿兩爲郡博士朝廷嘗以車輅院起之
即上書請老轉通直郎家居累年賜服緋魚壽七十有
九亦不可謂詩能窮人也慶元戊午正月

王推官洋漫齋文集序

龍泉在廬陵郡西幾三百里南與橫浦義柳接非四達之塗游客罕至故其人安分寡求非百貨所聚無富商大賈往來貿遷故其俗純而不雜獨山幽水清實鍾美於秀民徃徃忘外慕而志不分專以文章致身殆與諸縣爭雄長惟命有通塞故仕有顯晦其來尚矣英州推官王君諱洋字嘉謨自少力學負雋聲盛年冠大比謂宜摩九霄撫四海而命與時左困于場屋不得與鄉人

之顯者同然其學術日富筆力日雄譬之良農既勤菑
畝歲雖儉而家不餒又如良將自有方畧數雖奇而氣
不衰平生著述三十卷號漫齋集其子梟孫三省橐以
示予予曰此吾故人之文也讀累日不能釋蓋其詩賦
賸縟集類精切詩話博雅長短句清新有以起人之心
至於古樂府十篇直推見本原然後遣辭辨蘭貶蠅二
說則又用意至到直欲跂前脩而及之是宜自一家而
傳之一鄉而布之它邦豈特爲子孫之藏而已彼士之

達不達何加損焉鼎暨三省拜曰請以是爲序乃爲之序慶元戊午九月十五日

曾南夫提舉文集序

太和曾寅亮出曾祖常平使者遺文四十卷屬某爲之序某伏讀累日而歎曰此吾先大父秦國公元符庚辰同年進士也其何敢辭夫文亦多術矣以要言之學不富則辭不典氣不充則辭不壯才不高則辭不贍三者一有長焉足以名家况兼之乎公自幼讀書五行俱下

稍長徧抄經史傳記雖大寒暑未嘗輟著六經語孟老子通論數千言凡聖賢蘊奧古今成敗無不究極下至星辰歷數皆爲之說鄉先生劉弇韋明許可嚴甚每謂精博不可及其學何如也政和三年擢使益部中貴人鄧述市物無藝不如意輒焚之公疏其害民十事徽宗亟爲斥述廡訪王竦懼其并害已也誣公失察典吏受賕坐謫監當久之上思其勁直復起使兩浙湖南滋不改其操時禁舊學頒新義公作讀資治通鑑詩百餘言

卒章有何當釋書禁新學破盲聾之句其氣何如也生
纔八年賦白鷺詩云外潔臨清流中貪魚鰕求人已駭
伏甫中第蘇文定公歸自嶺南一見稱其邁徃嘗登鎮
陽樓慷慨作賦欲追禦寇拉稚川睨燕山眄井陘馳太
行涉滹沱其才又可知矣雖官止議郎年僅五十有五
而其文之典之壯之贍皆有後之學者能熟復以觀知
公爲不亡矣公諱安強字南夫其父肅字溫夫山谷黃
公宰鄉縣以清高處士目之生四子皆踐儒科仲安止

著禾譜五卷東坡蘇公所爲賦秧馬歌者公乃其季也
慶元戊午十月己丑

毛拔萃洵文集序

文者才也孝者行也全賦於天鮮矣制科時所重聲名
世所貴天之與人又加鮮焉吉水毛洵子仁具此四美
付與厚矣而位止幕職壽纔三十有二何其薄也同邑
曾三異無疑博古樂善悼其屈于百年之後既哀遺文
若干篇又錄名賢送行詩若干首仍纂其事實屬予爲

之序余曰貴爲公卿而才行不稱壽至期頤而名聲無聞生赫奕於一時沒寂寥于後世者滔滔皆是也子仁年雖天仕雖也而科名孝行載于國史垂於無窮以此易彼未知其孰爲厚孰爲薄也仁宗實錄天聖九年御試選人書判拔萃科中者四人舉首李裕嘗歷理掾故改大理寺丞是謂京官子仁而下皆自主簿遞遷幕職雖同得邑猶選人也其告身曰承事郎者文散官也大理評事者試銜也李燾仁甫長編併以爲京官則誤矣

又其父子皆得余襄公爲之銘父守實厥後倅歷三郡
卒於江東當時吉州上其死孝不知何爲繫之實州實
錄既云然仁甫遂從之大抵考證之學易差難精亦在
乎秉筆者審之而已慶元四年十月具位周某序

文忠集卷五十二

欽定四庫全書

文忠集卷五十三

平園續稿十三

宋 周必大 撰

序二

陸子履嵩山集序

本朝文章至慶歷而盛歐陽文忠公實主夏盟學者一
被品題徃徃名世當是時陸公子履乃與文忠周旋館
閣詩文徃復相與至厚其人抑可知已惜乎仕宦不偶

陷於朋黨起而復仆仆而復起晚遇裕陵自集賢脩撰
守河中召知審官東西院方嚮于用則已老矣君子每
有不遇之嘆焉今其曾孫知蘇於公既沒百年之後兵
火搶攘之餘冥搜博求僅得遺文十有二卷屬予爲序
將刻而傳之予嘗歎尹師魯蘇子美江隣幾梅聖俞丁
元珍皆著美名負屈稱與子履大畧相似彼五賢者得
文忠銘其藏序其文姓名鏗輶炳耀至今盪人耳目獨
公以後死不得與於斯文或者遂謂公生既不遇其沒

又重不幸也予曰不然公當古文復興時文忠實與爲
友其出倅宿州送以詩曰子履自少聲名馳落筆文章
天下知開懷吐胸不自疑世路迫窄多弄機鬢毛零落
風霜推十年江湖千首詩又曰一自蘇梅閉九泉始聞
東穎播新篇暮年酬唱尤多有怕逢詩敵力難當及敢
期佳句報琅玕之句是則公之生也已爲文忠所稱道
如此尚何待於身後其垂名不朽亦豈下於五賢哉予
故表而出之公諱經字子履洛陽人故以嵩山老人名

其集慶元五年二月一日少傅觀文殿大學士致仕益國公周某具

趙訓之忠節錄序

功烈有大小死節無輕重惟能捐軀殉國則求仁得仁豈必論其功之何如哉國家自靖康後金人蹂踐中原羣盜潰兵所在破城屠邑守官者奉頭鼠竄之不暇於此有人焉視死如歸其爲節也重矣當建炎三年歲己酉十一月隆祐太后自洪上贛護衛諸軍道有叛者既

犯吉之永豐皇族訓之字誨道以承議郎實爲縣宰率
弓兵拒戰力不敵遇害明年有司以聞特贈直秘閣仍
官二子有女歸太和蕭氏奉其喪葬于盧原今七十年
松檟鬱然女尚無恙其孫江州別駕彥楠捧檄來拜墓
下既哀制詞史傳又以宗人吉州推官子琬所著行狀
及諸公記跋共爲一卷命曰忠節錄屬予爲序予嘗觀
書太史氏是歲有直龍圖閣令歲守黃州城陷不屈而
死初贈右文殿脩撰再贈徽猷閣待制隆興改元張忠

獻公宣撫兩淮復用父老之言奏乞立廟遂賜忠顯之額今永豐纔以君像附城隍祠殆闕典也按子琇及與君聯事而行狀成於次年其書南幸并君之死皆差一歲惟永豐志題名載君以二年至縣者是也其死在三年冬而叙君本末反云四年涖官則又誤矣夫當日之行狀邑人之紀次或尚訛舛况傳疑於後世乎雖然此不足辨也此以詳言之者使士大夫知同時宗室爲守爲令死職如此於以彰祖宗涵養作成之效豈特慰其

子孫而已慶元己未四月

臨江軍三孔文集序

行有餘力則以學文聖人之言萬世是程或疑文行忠信之序是不然四科有先後四教非先後特因其材而進德焉繪事後素不容紊也本朝人物至元祐而盛其兄弟傑然則有臨江之孔氏曰文仲字經父曰武仲字常父曰平仲字毅父先聖四十八代孫也居家孝悌行己謹信涖官敬事上忠其行美矣冠禮部冠國學登高

第應制舉經自諫垣入詞掖常歷師儒堂內外制敎父尤
精史學更踐中外天下共稱其文號曰三孔今纔百餘
年而集稿散逸罕傳誠故郡之闕典也慶元四年太守
濡湏王邁實來政脩教明瞻喬木而慕先賢既奠謁其
像於學宮又博訪遺文而刻之雖曰存一二於千百然
讀之者知爲有德之言而非雕篆之習也總成若干卷
屬其以序者太史黃魯直頌當世之人才有曰二蘇聯
璧三孔分鼎張丞相天覺在元符中詆元祐詞臣極其

荒唐謂兩蘇爲狂率則剛直也謂公兄弟爲濶疎則高古也夫魯直於蘇氏分無師友天覺於眉山心伏其能皆以公兄弟配之文行何如哉若其出處載國史博雅具別著此不備書五年四月甲戌具位周某序

孫尚書鴻慶集序

大凡文人才士少之時屈首受書未能多閱天下之義理壯則從事四方志有所分及其老也血氣既衰聰明隨之雖有著述鮮克名家此古今之通患也其或軼羣

邁往賦才獨異而復天假之年磨淬鍛鍊重之以湖山之助名章俊語少而成壯而盈晚而愈精有若戶部尚書晉陵孫公蓋千萬人中時一遇焉公生于元豐辛酉當大觀政和間士惟王氏三經義是集而公博學篤志如韓退之謂禮部所試可無學而能者第進士冠詞科筆勢翩翩高出流輩將及知命靖康俶擾爲執法爲詞臣旋由瑣闥歷吏戶長貳連守大邦其章疏制誥表奏徃徃如陸敬輿明辯駿發每一篇出世爭傳誦紹興而

後遭口語斥居象郡久之歸隱太湖上捨蠻蜚而狎鷗
鷺去茅葦而友松菊于是繙北堂萬卷之鈔袖明光起
草之手默觀物化吟詠情性煙波萬頃納之胸次風雲
變態日接於前如是二紀所得不可勝計毋怪乎筆端
之滾滾也天門劃開訴章上達論撰次對璽書繼下年
雖耄老親爲謝表至於宰執侍從臺諫則人致一啟各
出新意其用意屬辭少壯所不逮又後十載當孝宗朝
嘗命編類蔡京王黼等事實上之史官此與伏生年九

十餘詔太常徃受尚書何異是豈可以他人老少常理
論也哉沒既一世其子興國太守介宗以書謂某曰先
君文稿中更兵燼存者無幾而閩蜀所刻復雜翟忠惠
之文大懼不足傳信今定爲四十二卷其未備者方裒
次外集爲我序之憶乾道丁亥遇公陽羨公八十有七
矣論文之餘語及前朝舊事健論滔滔如洪河東注緒
言纚纚如聚蠶繅絲屢更僕不能休然後知公非特文
鋒不可當而老如趙充國猶善爲兵也茲幸掛名集端

因具列之近歲吏部侍郎葛公立方作韻語陽秋載東坡自海南歸公方髻亂坡命對衡門稚子璫璵器公應聲云翰苑仙人錦綉腸坡嘆曰真璫璵也以公早慧固應有此然坡北歸實靖國辛巳公已二十一得非元豐乙丑自便還常公纔五歲時手所記訛耳鄉人戶傳亦不得而畧也公諱覲字仲益嘗以龍圖閣學士提舉南京鴻慶宮故自號鴻慶居士云慶元五年十一月

初寮先生前後集序

一代文章必有宗惟名世者得其傳天生斯人固已不數向非君師作而成之則其道不墜於地者幾希若稽本朝太祖以神武基王業文治興斯文一傳爲太宗翰林王公元之出焉再傳爲真宗楊文公大年出焉長養尊用風示學者雖間以剛直被排斥而眷顧終不少衰至於仁宗英宗神宗然後異才充滿中外其傑出如歐陽文忠公又逢時得政同心德於三朝閱八年之久相與化成天下功不少矣故其門人高第尤多惟東坡蘇

公崛起西蜀嘉祐收以異科治平欲躡寘翰苑熙寧首
待以國士及遇哲宗遂光顯於朝中間小人敲撼挫摑
欲殺不果者天意也上賜也晚守中山尚書左丞王公
世家是邦博學工文詞年十六即貢京師後二年坡至
奇之公亦自謂得師也明年坡南遷不能卒業公尋登
第關初寮於精舍日夜讀書著文年二十有七游五臺
爲竹林泉賦以將相喻泉石格高而意新送某曾大父
詩云不論與汝小一月政自容君數百人專用吾宗公

瑾伯仁事致推尊年德之意精切渾成不類少作時方
諱言蘇學而公已潛啟其秘鑰久之徽宗旁求文士召
真館閣給札親試驟掌書命由中司入北門歷二轄其
詔制表章詩文大率雅重溫潤而時發秀傑之語定功
繼伐等碑睿謨曲宴百韻詩多出特命上恩與天通矣
萬目睽睽徒謂其鶴鳴九臯而不知奪胎換骨自有仙
手故未嘗以曲學指之今前集四十卷是也中興南渡
四海名勝遷謫避萃于湖廣而公壻趙奇子辟章又家

之游夏大篇短章更唱迭和既已盡發平昔之所蘊且
復躬閱事物之變益以江山之助心與境會意隨辭達
韻遇險而反夷事積故而逾新他人瞠乎其後我乃綽
有餘裕至於桂柳佛寺諸記閎深辯麗近坡暮年之作
黃張晁秦既沒系文統接墜緒誰出公右豈止襲其裳
佩其環而已今後集十卷是也初公與先大父同爲元
符庚辰進士政和中公典貢舉擢先公第二故公季子
承議郎辟綱及公孫刑部侍郎柅曾孫今邕守宗孟繼

以集序爲請久負諾責夫豈無說蓋公內制十八卷外
制八卷李文敏公漢老實題其首且謂公天才英邁筆
力有餘於文於詩瓌奇高妙無所不能用是序公全書
所謂一言以蔽之者某尚何所伸其喙若夫本天人之
相因考源流之所自以申叙累世之契好而告諸來者
則不敢辭也公諱安中字履道享年若干後學尊之曰
初寮先生故以名集慶元六年二月日

續後漢書序

曹氏代漢名禪實篡特新莽之流亞丕方登壇自形舜禹之言固不敢欺其心矣今向千載好惡豈復相沿而蘇軾記王彭之說以爲塗巷談三國時事兒童聽者聞劉敗則顰蹙曹敗則稱快遂謂君子小人之澤百世不斬茲豈人力強致也歟陳壽身爲蜀人徒以仕屢見黜父又爲諸葛亮所髡於劉氏君臣不能無憾著三國志以魏爲帝而指漢爲蜀與孫氏俱謂之主設心已偏故凡當時祫祭高帝以下昭穆制度皆畧而勿書方且乞

米於人欲爲佳傳私意如此史筆可知矣其死未幾習鑿齒作漢晉春秋起漢光武終晉愍帝以蜀爲正魏爲篡謂漢亡僅一二年則已爲晉炎興之名天寶命之是益公論也然五十四卷徒見於唐藝文志及本朝太平御覽之目逮仁宗時脩崇文總目其書已逸或謂世亦有之而未之見也幸晉史載所著論千三百餘言大旨昭然劉知幾史通云備王道則曹逆而劉順本朝歐陽脩論正統而不黜魏其賓客章望之著明統論非之見

於國史近世張栻經世紀年直以先主上繼獻帝爲漢而附魏吳於下方皆是物也今廬陵貢士蕭常潛心史學謂古以班固史爲漢書范曄史爲後漢書乃起昭烈章武元年辛丑盡少帝炎興元年癸未爲續後漢書既正其名復擇注文之善者併書之積勤二十年成帝紀年表各二卷列傳十八卷吳載記十一卷魏載記九卷別爲音義四卷惜乎壽䟽畧於前使常不得追記英賢憲章於後以釋裴松之遺恨也昔周東遷浸以微弱至

春秋時僅存王城而吳楚強大綿地數千里皆僭稱王
聖人斷然以夷狄予之昭烈土地甲兵甚非周比興於
漢中適與沛公始封國號同天時人事決非偶然孔子
復生必有以處此乃爲首探魏文當日之心次舉蘇氏
百世之說以合習氏之論而證舊志之非作續後漢書
序慶元六年庚申二月望

高瑞叔變離騷序

詩國風及秦不及楚已而屈原離騷出焉衍風雅於詩

亡之後發乎情主乎忠直殆先王之遺澤也謂之文章
之祖宜矣厥後宋玉之九辯王褒之九懷劉向之九歎
王逸之九思曹植之九愁九咏陸雲之九愍皆九章九
歌之苗裔自楊雄至劉勰則或反或廣或爲之辯祖述
摹倣不可勝數迄今本朝晁太史補之始重編楚辭十
六卷續楚辭二十卷又上起荀卿下逮王令集變離騷
二十卷每篇之首各述其意本根枝葉備于是矣今高
君元之復著變離騷九篇其友南康周令大受刻而傳

之屬予一言予觀晁氏所謂變者言歷代每有所作其則愈遠如唐兵三變之變也君蓋泝流求其源由終復於初如齊魯一變之變也二者文同而旨殊君之上下序議論尤平正既不溢美亦不失實愍奇志等既續其詞復循其義非深於斯道能如是乎故爲推明之以俟知者元之字端叔武烈王瓊六世孫生以紹興壬戌苦學篤志假寐絕床不就枕者累年尤嗜春秋學嘗從科舉兩薦於四明有詩千篇大抵學廣而辭暢自號茶甘

集死已二年席珍如此埋光不耀重可歎也慶元庚申

四月旦

王參政文集序

儒生文士或不足於事業名卿才大夫於文辭又不屑
爲自西漢以來二者已難兼矣班固作儒林傳記二十
七人丁寬以易名家爲說至三萬言及景帝時乃爲梁
王將兵距吳楚號丁將軍與韓安國等俱有功固遂推
爲儒林之冠復於京房高相傳中一再稱將軍而不名

以示別異蓋有深意存焉故參知政事襄陽王公諱之
望字瞻叔生于羊杜成功之地慕其爲人博學能文知
畧輻輳紹興八年試南宮蜀士孫道夫奇其文力白知
舉請實魁選位卑不見聽然亦名在第八十三年行都
太學成高選學者明年以公爲錄即兼博士坐閱五年
每值談經同僚往往避席四方英俊爭求指授作成爲
多其傑然如王詹事十朋皆是也便鄉求守荆門遂持
節入蜀徧歷外臺以王官總軍賦適金人渝平王師十

萬攻取郡縣保守關隘累日不解甲公與將帥議論往復費金穀鉅萬計而儲衍素備蜀民不知也孝宗即位公出使九年矣官至太府卿而難其代詔侍從臺諫集議於是特增置戶部侍郎升堂諭使留公于蜀某忝御史實發此議明年始還朝仍以版曹叅贊都督府初見上奏疏二千餘言極論人主注治兵與臣下不同當如舜禹漢唐及祖宗所以奉承天意者援據經史開陳時事上大喜有大用意旋自銓曹直翰苑易諫大夫宣諭

淮西措畫邊防講明軍政上益注意即拜參貳兼行右
府時和戰未決衆論不齊僅三月除職奉祠而去眷倚
殊未靳也起典帥藩超進資政殿大學士而公病不能
興矣其季子鉛通敏好學念公遺文刻于蜀者訛舛特
甚手加編校定爲漢濱集六十卷謂某之先大父與公
先正爲同年進士以序見屬惟公學根於經故有淵源
文適於用故無枝葉奏劄甚多皆可行之言內制雖少
得坦明之體酷嗜吟咏詞贍而理到嘗游大峨賦長韻

與客賡和至六七篇下語如珠之走盤用韻如射之破
的其他著述大率近是世論文章事業公實兼之豈與
夫一偏一曲之士校短量長而已惜乎時雖逢而未能
盡其才位雖高而不能久其任後之人讀公之文尚可
以想見其爲人而秉筆太史氏者亦或有攷於斯焉慶
元六年四月日序

陸氏翼益音解序

八卦畫而萬象分此文字所由作也自五帝迄戰國雖

六書之法形制或異然篆籀猶存未失本意秦便末俗
始改散隸後世益以僞謬傳寫六經論孟間改舊文而
諸儒用今字爲注解因今韻立音訓道隨說隱義逐時
晦爲不少矣韓退之云凡爲文辭宜畧識古字故寶蓄
科斗孝經及漢衛宏官書以爲依據奈何後之人不復
致意于斯也臨川陸嘉材諱筠一字元禮博習脩潔登
紹興乙丑進士第不汲汲進取惟盡心於所蒞初主貴
溪簿闢邪說而正官廨王右史洋爲之記厥後魔賊焚

縣相戒獨留簿廳其感人心如此仕至朝奉大夫浙西
安撫使叅議官賜服金紫享年七十有六平生篤志孟
子著翼孟音解九十一條擇春秋左氏傳莊列楚詞西
漢書說文之存古文者深思互考遂成此書如以折枝
爲磬折腰肢讀樂酒樂山樂水角招爲韶眸子爲牟殺
三苗本作竅二女果本作嫫之類皆粲若白黑至論舜
生於諸馮遷于負夏卒于鳴條視漢儒所記檀弓蒼梧
之語孰近孰遠孰信孰疑此古今學者議論所未及也

且舜居河東歷山雷澤各有其地而越人別指歷山舜井象田仍以餘姚上虞名縣風土記曲爲之辭人不謂然蓋異端之作其來也久于舜平居附會已類此况身後乎所謂九疑之葬二妃之溺宜退之黃陵碑云皆不可信彼孔安國解書以陟方訓升道其說尤拘書固曰升高必自下陟遐必自邇陟豈專訓升乎然退之近捨孟子而遠引竹書紀年何也予每歎恨不得質疑于韓門而喜嘉材嗜古著書有益後覺藏其本殆三十年今

嗣子新融水尉孝溥追叙先志請題卷首始爲推而廣之昔唐彭城劉軻慕孟子而命名著翼孟三卷白樂天記其事賴以不朽嘉材視劉何愧特予非樂天比其能使嘉材不朽乎慶元六年四月戊戌序

文忠集卷五十三

欽定四庫全書

文忠集卷五十四

平園續稿十四

宋 周必大 撰

序三

澈溪居士文集序

孔子曰君子疾沒世而名不稱惟有其實則名從之是不可求也雖然賢如夷齊學如顏淵皆得夫子而名益彰彼身居岩谷砥行立名非附青雲之士湮沒無傳者

多矣此司馬遷所以深嗟而屢歎也朝奉大夫廬陵彭公諱醇字道原生而穎悟六歲時賦中秋不見月詩有警句自是以詞章經術馳聲鄉閭年三十一登第常攝行臨川靖安二邑已而令石首令湘陰守康守賀守南安所至儒雅飾吏在循良之目垂七十納祿而歸自號定庵又曰卧雲翁有澈溪居士集五十卷議論平正如其為人今四世孫鄉貢進士叔夏既譜公出處姪孫信州永豐主簿汝翼復裒遺文於兵火之餘得二十卷求

序於余共惟本朝元祐以來人才盛矣忠言正論著於
籍者三百九人極天下之選頒之郡國載之國史垂之
萬世而公姓名在焉則公之賢為何如六一先生之後
文章莫如東坡時人或得一語終身榮之考前後集答
士大夫啓纔四十篇而獲麟騎箕之歲回賀州啓在焉
既曰賜以尺書借之餘論又曰溫辭下逮陋賀增華則
公之文為何如孔子之所言太史公之所歎公一無憾
託名不朽尚何疑焉况叔夏與其兄叔夜皆有文行而

汝翼及其弟瀏陽尉夢弼以家學同榜登科又將立身行道揚名於後世斯文也豈特如孔惺鼎銘稱其先祖之美而已嘉泰元年三月辛未

杉溪居士文集序

登文章之錄固難矣詩於其中抑又艱哉劉夢得曰心之精微發而為文文之神妙詠而為詩司空表聖亦云文之難而詩尤難又嘗喻以飲食不可無鹽梅而其美常在鹹酸之外之二說者前輩有取焉古者教士以四術

教子於過庭皆以詩為首本朝蘇氏自編東坡前後集亦先列詩篇其所從來遠矣今杉溪居士劉公殆有得於斯歟始予少時聞公賦詠一出輒手抄而口誦之味清江引則欲進乎技而凝於神歌出塞行則如視旗影而聆鼓聲也讀大堤曲長相思則又如望歸舟對斜月而聽情人思婦之語切切也其他摹寫物象美今懷古登臨比興酬贈祖餞皆凌厲乎先賢度越乎流輩蓋得於天者氣和而心平勉於已者學富而功深故于所謂

至難者既優為之則其制誥有體議論有源銘誌能敘
事倡頌多達理固餘事也藻飾王度冠冕諸儒領袖鄉
黨有以也夫公諱才邵字美中世居廬陵年二十四大
觀三年釋褐甲科宣和初復中詞學第二兩登館閣一
掌外制再直翰苑仕至工部侍郎兼權吏部尚書丐歸
優進顯謨閣直學士奉祠卒於家年七十二其孫承議
郎恪類公集為二十二卷授其子國學生千齡至是以
序為請故為追述見聞而題其端杉溪公自號也嘉泰

元年二月旦

漢兵本末序

臨江自三劉有功漢史其學盛行今徐筠孟堅既為漢官考四卷季天麟仲祥又惜司馬遷班固不為兵志於是究極本末類成一書注以史氏本文具有條理凡中外諸軍若將帥之名與夫賞功罰罪繇戍簡稽兵器馬政參互討論略無遺者數請予序其意予觀周禮雖分六職而小宰以官府六聯合邦治每措軍旅於祭祀賓

客七事之中司馬名為治兵多及坐作進退而徒役旗
常車甲之屬散於六官大師用衆之禮乃在宗伯後世
趣便一時古制遂亡人徒知井田一壞為四民之害而
不知興衰治亂舉出於兵此邦家之害也人徒以開阡
陌罪秦而不知變內政以作俑者齊也蓋古者卿大夫
家曰百乘諸侯國曰千乘天子則曰萬乘始於四丘為
甸甸有戎馬有兵車有牛有甲士有步卒是以師田共
務文武同方漢承秦後兵農幸未全分如欲復古猶易

為力至武帝窮師黷武加以橫斂其又奚言國不足於
兵將每難其人有自來矣予故因漢氏之失策及先王
之遺意使學者有考焉嘉泰元年二月既望

求齋遺稿序

慶元戊午春永豐鄧傳之年十有九袖書過予謂堯時
教化已明雖康衢小童擊壤老農歌謠皆可傳誦況於
卿士其樂之和上儀飛鳳下舞走獸況於蒸民予異而
禮之自是數相過每切於師友問諸鄉人皆言傳之資

質早成積學篤勤十三作祭叔祖文十五作登山賦語
多老蒼十六七時從儒先曾丰幼度邑宰黃景說嚴老
講習詩文復侍族伯約禮文範官永嘉因游葉適正則
之門歸作求齋記大槩欲自求於內收放心於外又論
顏子之樂惟在博學藻繪組織何有哉用志如此予方
期之遠大忽以疾告亟饋之藥遽以訃來是可惜也他
日其父自哀遺稿四帙丐題其端蓋傳之於六經尤好
讀易有繫辭說一卷評論史漢名臣及詩賦記序箴銘

雜說皆出入經傳推尋義理舉業亦不廢也予聞李觀
元賓第於貞元壬申明年中詞科又明年年二十九卒
韓退之為識其墓廐後李漢編韓集凡銘誌十二卷近
七十篇乃起於元賓由是文行益章今傳之財二十一
耳加以數年進而不止豈減元賓而未霑一命僅存遺
書時無退之誰能取信姑詳述本末少塞其父之悲云
嘉泰元年二月二十日序

仲并文集序

辛酉夏

江都仲并彌性自少卓犖不群潛心問學力排王氏一偏之說惟六藝孔孟是師筆勢翩翩雋聲藉甚紹興壬子擢進士第高宗方汲汲人才歲在甲寅丞相勝非執政松年與一二侍從相繼薦對上一見褒賞特改京秩詞臣王居正草制云學知是非邪正庶幾孔子所謂可與共學者當是時人之期君君之自期皆謂公卿可立至或疑年少資淺宜試以事補外而去三年丁巳丞相浚執政與求守與義復以名聞召至闕而樞密使檜頗

不謂然君即移疾出倅京口自是棲遲間退者二十年
孝宗初元擢承光祿晚知蘄州議論才畧既未盡見於
用而平生著述亦多散失外孫南安太守孟猷嗜學好
修淵源有自裒成浮山集十六卷以序見屬予婦家於
君有連且嘗同朝熟其才華故樂為言之夫文體衆矣
吟咏情性莫重於詩仕途應用莫急牋啓詩也者造意
深則辭或齟齬次韻多則句或牽帥君之古律如王良
造父馭駿馬駕輕車有犇軼絕塵之勢其賡險韻如繭

抽絲印印泥愈出愈新送妹長篇孝友慈愛溢於言外
殆欲上規風雅一何盛也其四六叙事雖闕肆而關鍵
寔密對屬雖切而非駢儷所能拘最後蘄州謝上表以
古文就今體自成一家凡為國撫民據舊圖新之意無
愧前哲此由學廣聞多非特天才駿發而已其他論時
事條利害深切明白務在可行為莊安常行狀見謂三
長雜著題跋清雅可愛復以餘力出入釋氏游戲歌詞
無不過人夫其才學如此幸早為君宰所知而不得雍

容禁省歌頌大業其命也夫雖然裕於才者薄於命文士常然獨君乎哉姑詳著以釋南安凱風寒泉之思云

程洵尊德性齋小集序

自元祐間蘇文忠公有詆伊川程氏之語門人怨怒力排蘇氏由是學問文章遂分洛蜀識者非之紹興甲寅予自湘中歸廬陵有錄事參軍婺源程洵允夫袖長書及所業一通相過合蘇程為一家心竊異之已乃知其於朱熹元晦為中表自其先世相與講學又酷嗜眉山

之文為三蘇紀年十卷間以示予凡其父子出處詩文
先後前輩議論之所及編纂畧盡未幾洵以病卒官後
累年其宗人法曹萬里出君尊德性齋小集一編合古
律詩百餘篇記序書銘各二跋四說一誌表行狀祭文
叙事劄子五表啓五十一大抵議論正平辭氣和粹蓋
嘗記其師里人李縉之言曰道有遠近學無止法不可
見其近而自止必造深遠然後有成此程氏學也又曰
文以載道物有是理辭者達是而已此蘇氏學也君之所

得寔本於縉學者果可無淵源乎惜夫久困場屋五十
由恩科入官主簿衡陽一轉而止不得發聞於世予故
序其書以告來者

帝王經世圖譜題辭

漢司馬談父子貫穿經傳馳騁古今謂當時六藝已千
萬數故有儒者博而寡要勞而少功之言唐韓愈文不
絕噍編不停披然亦記事提其要纂言鈎其玄深矧去
古逾遠衆說日繁才學未迨於前賢宜其用力勞而見

功微此圖譜所由作也雖然分門類事者固多其能旁搜遠紹合異為同則鮮矣金華唐仲友字與政於書無不觀於理無不究凡天文地志禮樂刑政陰陽度數兵農王伯皆本之經典兼採傳註類聚羣分旁通午貫使事時相參形聲相配或推消長之象或列休咎之證而於郊廟學校畿疆井野尤致詳焉各為總說附其後始終條理如指諸掌每一篇成門人金式輒繕寫藏去積百三十有二篇又得與政猶子煊別本相與校讎釐為

十卷以類相從會分教廬陵將鏤板校官而郡守趙侯
善鑄助成之屬予題辭夫水之流東惟海是歸車之指
南其塗不迷今是書折衷於聖人示適治之路故名曰
帝王經世圖譜非其他類書比昔漢儒專通一經仍守
師說居家用以修身蒞官取以決事況乎六經旨趣百
世軌範皆聚於此學者能因廣記備言精思博考守以
卓約則他日見諸行事豈不要而有功也歟與政名臣
少登兩科歷祕省正字著作佐郎出知信台二州擢江

西提點刑獄孝宗深知其才不幸得年五十三凡所蘊蓄百未究一予每與士大夫共惜之因序其書併告來者嘉泰元年七月日前進士周某書

曾氏農器譜題辭

紹聖初元蘇文忠公軾南遷過太和邑人宣德郎致仕曾公安止獻所著禾譜文忠美其溫雅詳寔為作秧馬歌又惜不譜農器時曾公已喪明不暇為也後不餘年其姪孫來陽令之謹始續成之凡耒耜耨耨車戽簞笠

銓刈蓀蕒杵臼斗斛釜甑倉庾厥類惟十附以雜記勒
成三卷皆考之經傳參合今制無不備者是可補伯祖
之書成蘇公之志矣其叙牛犂蓋一編之鎡鎔予嘗學
稼因演其說山海經云后稷之孫叔均始作牛耕世以
為起於三代予謂不然牛若常在畎畝武王平定天下
胡不歸之三農而放之桃林之野乎故周禮祭牛之外
以享賓駕車犒師而已未及耕也不然牽以蹊田正使
藉稻何足為異乃設奪而罪之之喻耶在詩有云載芟

載柞其耕澤澤千耦其耘徂隰徂畛又曰有畧其耜俶
載南畝以明竭作於春皆人力也至於獲之積之如墉
如櫛然後殺時犉牡有捄其角以為社稷之報若果使
之耕曾不如迎猫迎虎列於蜡祭乎厥後王弼傳易以
為稼穡之資宋景文公初闢之曰古者牛惟服車書肇
牽車牛易服牛乘馬漢趙過始教牛耕蓋本賈思勰齊
民要術予謂輔嗣固失矣賈氏及景文亦未為得也按
論語子謂仲弓曰犁牛之子騂且角雖欲勿用山川其

舍諸此聖人格言也蓋犂田之牛純雜牝牡皆可祭牛則非純非牡不可故曰騂且角也注疏乃以犂為雜色騂為赤純色角為周正近世諸儒並從此義今觀周禮牧人時祀牲必用拴拴純色也外祭毀事用尨尨雜色也是則純雜之辨也封人設其楅衡魯頌夏而楅衡白牡騂剛是則言角之意也竊疑耕犂起於春秋之間故孔子有犂牛之言而弟子冉耕亦字伯牛彼禮記呂氏月令季冬出土牛示農知耕早晚賈誼新書劉向新序

俱載鄒穆公曰百姓飽牛而耕暴背而耘大率在秦漢之際何待趙過特教人耦犂共二牛費省而功倍爾易傳出於魏晉第見牛耕不復考其初而賈公彥考工正義遂謂起於後漢其失尤甚然則山海經果荒唐歟曰班固藝文志山海經十三篇而劉歆所校凡三十二篇定為一十八篇固已不同歆又云出於唐虞之際今考史記以不窋為稷子譙周已謂世代不合况叔均乎故無錫尤袤定為先秦之書非夏禹及伯翳所作甚明其

在春秋之後無可疑者世人習熟見聞多惑是說予之
譚諄亦可哂哉若杞之屬揚雄方言往往三名耒陽既
書之矣宦游寢遂他日所至枚舉名物採方言而附之
非所謂後世復有子雲者耶嘉泰辛酉八月

曾無愧三英南北邊籌序

高宗南渡之初金人方強未暇弔伐士大夫日夜為防
守江淮計是時右正言呂祉獻言最切後以直龍圖閣
帥金陵遂與僚屬吳若陳克著東南防守利便三卷上

之事既詳寔文亦條暢蓋若克皆文士而祉則以功名
自許者也紹興辛巳完顏亮叛盟明年孝宗即位銳意
恢復不但守淮防江時則有尚書郎臨川吳曾著南北
征伐編年二十三卷起三國終五代凡古今形勢師旅
勝負該貫無遺仍集當時君臣議論為分門事類一十
二卷其相謀相應攻守通好可指諸掌視社之書益加
詳焉今臨江曾君三英復為邊籌十八篇南之攻北其
事有九諸葛亮紀瞻褚裒元溫劉裕宋文帝陳顯達沈

慶之吳明徹是也北之圖南其事亦九曹操魏明帝羊
祐苻堅拓跋太武孝文元英邢巒北齊是也人為一論
論指一事皆援昔以證今因跡以求心即成而究敗考
古可謂勤而用志可謂切矣他日上之樞庭必有運良
平之籌者傳之良將必有合孫吳之法者苟非其人道
不虛行豈特刻舟記劍按圖索馬而已哉嘉泰元年三
月旦

張良臣雪窓集序

富貴繫乎天一定不能易安之可也詩文則不然盡心力而為之期至乎古人乃止耳雖然天之降才正自不同孟窮苦纍纍韓富浩穰穰宮商合奏斯有取焉襄邑張良臣字武子家於四明篤學好古擢龍興進士第日從魏南夫史直翁二丞相遊仕宦二十餘年他人朱紫君困青衫他人鍾鼎君樂簞瓢方二公薦士如林君芒屨藤杖日與高僧逸人往來蓮社間不復以名官為意淳熙末始管庫行都則又蹇驢破帽苦其心志於灞橋

風雪中朝士稍稍知而愛之僉謂宜掌故六曹馴致館
學予間兩社有意啓擬而君病不可為然後知二公前
日遺君者命也命乃在天無可奈何孰使君憊心疲精
晝鍛夕鍊自苦於吟咏欲效陳無已之簡古呂居仁之
淡泊至於古賦樂曲又將推而上之忘其心力之艱勤
此豈非天乎後十五年君之弟堯臣裒古賦四篇古律
詩數百首號雪窓集介友人曾三異屬予以序嗟夫富
貴不可致君固安焉擇術復自苦有郊之窮而交游無

韓之富相和成音天之與人兩不相遇予誠憐而悲之
故為詳記本末堯臣亦工詩殆所謂二難者耶嘉泰元
年十二月日

忠正德文集序

高宗中興用宰相十五人曰忠曰正曰德曰文兼而有
之者其惟趙公元鎮乎此非私言高宗大書賜公云爾
方建炎三年車駕巡幸江浙内外多故公初為尚書郎
上已用其言罷王安石配享俄被簡擢歲中歷司諫殿

中侍御史遂為中丞上語苑宗尹云鼎在言路極舉職
所言四十事已施行三十有六蓋祖宗初除言官即置
簿載所言事目考多寡當否已行即朱銷其下外庭未
必知也先是政和以後爵賞日輕公請惜名器抑僥倖
諸將恃功恣橫劉光世部將王德至殺韓世忠之將陳
彥章而世忠亦躬率部曲攘金陵守連南夫府解公攝
德鞠於臺中累疏乞正世忠罪悍將稍稍知畏內侍馮
益挾舊恩詬張俊公極論其橫卒斥逐之遂以中正進

登西府坐沮辛企宗節鉞補外暨入相明元祐臣僚非
辜薦任申先張燾范冲朱震王居正等布列清近一洗
章惇蔡京王黼輕用侍從之弊金震合肥決策親征江
淮庶定復還臨安皆身任安危慮無遺策蓋公解梁人
氣節端方學術純正筆力又過於人凡處分軍國機務
多其視草然後御劄付外惟德與文又孰加此當是時
邪正洞分紀綱大振國勢日尊指期恢復適恩平郡王
出閣封拜與孝宗一等公請稍示降殺同僚讒間遂行

罷政之後繼以南遷言者每指公不主和議而公平居
未嘗有一偏之說也高宗更化復特進觀文殿大學士
孝宗繼志賜謚忠簡又贈太傅追封豐國公侑食高宗
廟廷擢用諸孫惟韞暨謚為郎為監為部刺史二千石
寵靈焜耀已歷三朝公論既伸九京可無憾矣某嘗讀
唐史李德裕傳愛其上丹宸六歲禁止戚里請求奏停
盤條繚綾忠言正論著於中外及大用則欲尊朝廷肅
臣下政出宰相挾術詭時以進者每闕之不使中人監

軍掣諸將之肘用兵伐叛詔書付宰司乃下處報機急
武宗必命德裕起草與公事業如出一揆其最可異者
德裕自分司東都貶潮州司馬公奉祠四明以散官安
置於潮德裕明年貶朱崖司戶而卒公亦移置其地薨
焉得年俱六十三始終相類復如此豈後身歟始公謫
潮潮人敬愛不忘天道好還謚今來守此土追懷祖烈
將刻遺稿附昌黎文以傳凡擬詔百有十雜著八古律
詩四百餘首奏疏表劄各二百餘篇號得全居士集而

以樂府四十為別集屬某題辭某按國朝故事眷待故
相多賜嘉名掲碑首或二字或倍之公之生也幸拜宸
奎褒稱四美某已敷衍於前矣盍就以名集昭示萬世
視碑額庶有光焉謚曰諾哉是為序嘉泰元年臘日

撫州登科題序

大江之南分東西兩道自東而西首曰撫州其為郡在
三國孫氏至隋唐雖易置不常然今建昌軍治南城統
南豐入閩為邵武軍本皆撫之屬邑非特地大人庶冠

冕一路而文物盛多亦異他邦本朝最重儒科臨川圖志載題名記一卷起太平興國五年樂史而下至淳熙七年姓名具焉今州學教授富沙劉填將增廣刻之石使來者可繼而郡人太學博士王克勤士子涂公達見屬題辭夫為己之學垂世之文固不專為祿仕計然拔起耕釣今異乎古特詔舉辟久置不講士進德脩業懷才抱藝大欲平治天下次將黼黻斯文拾科舉安出哉是以二百餘年間賢達相望試言其顯顯者晏元獻公

之進賢好善王文公之文學行誼曾子固輩之主盟斯
文此一身所當勉也樂氏曾氏王氏父子兄弟相繼策
名此一家所當勉也名士如謝逸與其弟邁學術淵源
砥節礪行厭場屋而捨之肆其孫源曾孫樞繼預黃甲
蓋不在其身必昌厥後此又一鄉所當勉也若乃汪草
以奇才冠南省陳儒因版授遜大魁是皆傑出人上者
後生得不思齊乎近乙未歲羅點廷試為榜眼劉堯夫
釋褐冠上舍克勤由童子舉入館閣是又盛事參集者

諸生得不踵武乎凡此五者有美有勸教官作成之意深矣克勤再第進士公達之先由元祐至今登科者十餘人二君於此惓惓故嘉其志并及之嘉泰二年二月旦

張文靖公文集序

德之盛者必有言言之文則行也遠肇自帝王之世臯陶邁種德尹躬享天心即其人也昔者孔子定書舉臯陶矢厥謨於三謨之首賡帝之歌至於一再而伊訓咸

有一德太甲上中下千有餘言並載百篇之中以其可
為萬世法也揚雄漢儒之傑然者嘗賦甘泉稱頌人主
搜逮索耦豈無他人獨曰臯伊之徒冠倫魁能其深知聖
人之意也歟後世文士平居道古今官達掌制命論議
於侍從訃謨於廊廟暇則作為詩歌以寓比興體雖不
一要皆出謨訓然德有差等言有精粗其傳久近亦必
隨之若參知政事毘陵文靖張公殆有德之言行遠之
文也初以經明行修發為詞章連中科第馳聲四方在

高宗時為名御史掌內外制遂踐二府上以端人正士
目之大詔令多出其手陳善閉邪拔賢引類功不少矣
再貳國鈞垂登宰席方且逡巡退避或入侍經筵或出
典大藩雖權臣專國勲業不容盡究而文集五十卷奏
議二十五卷盛行於時今公之孫戶部尚書抑學世其
家數請為序某固嘗考公之德誦公之文知其學術本
原乎臯伊謀猷遇合於虞商蓋中興人物之冠冕也敬
題卷首以補任昉文章緣起之未備云公諱守字子固

一字全真其出處事業則有故相張忠獻公誌銘在嘉
泰二年九月

王氏濟美集序

大名王氏有諱言者唐末起家令黎陽子徹仕五代為
左拾遺是生晉國公以雄文厚德為藝祖簡知擢監察
御史選守鄉邦有畫錦之褒嘗植三槐於庭期後人之
興太宗朝仕至兵部侍郎知開封三子長祕書丞終袁
州太守次丞相魏國文正公也季知應天府孫曾繁衍

為宋大家淳熙六年黎陽八世孫知信州諱從系出祕
丞稽其族屬自晉公三子派別支分曰世系曰世譜又
為槐庭雜記宣陽因親錄以授其子淹淹倅廬陵既刻
其曾祖諱震元豐懷遇集請予為序又裒晉公以來史
傳銘誌前賢紀述先世遺文總為十卷號濟美錄而以
文正子懿敏公所纂遺事及懿敏子鞏雜記三編與其
父書併為一集而刻之自廬陵擢守筠州將再刻以廣
其傳復屬予以序粵自周衰賢者之類棄功臣之世絕

故孟子告齊宣王以故國非喬木王無親臣矣蓋諷其上也雖然有位於朝不守其業而忘其所甚至公侯之家降在皂隸則華門圭竇得以陵之此豈獨上之人罪也哉今筠州父子不隕世業以貽厥後其賢於人遠矣初文正公以大理評事宰岳之平江圖經載二事其一公將至山鬼避舍是特識公之貴勿書可也而國史楊文公誌墓乃備書之其一死囚當論公通夕不寐思所以為計五鼓有叱直更者起云相公將出廳湏臾公果

出囚竟末減民懷德政至今奉祠而傳與碑反不之載
予故特書之使後人知公仁心陰德肇於為邑况秉鈞
乎居官者勉以為法則王氏之昌與淮水俱長何但三
槐蔽芾於堂而已嘉泰二年閏十二月

芮氏家藏集序

夫子曰有德必有言謂其和順積中英華發外也今於
吳興芮公見之公諱烜字仲蒙一字國器孝弟忠信博
習脩絜登第後每有慷慨憂時之志鄉里前輩如劉一

止沈玠諸賢皆敬愛之紹興末高宗將內禪殿中侍御史蜀名士張震以名聞高宗曰是能古文者即日擢監察御史已而出入中外為孝宗深知許以侍從兩朝眷遇蓋如此不幸自司成移疾而終年纔五十八予在從班與六曹長貳給舍相與悼歎共為奏云伏見故國子祭酒芮燧德配前修文高當世恂恂自守未嘗與物競及當官而行則秉誼据正有不可奪之志故相秦檜時鄉人沈長卿作牡丹詩有許以為謗訕者引燧為證廷


尉捕治熒力辯其非長卿不任笞掠親書誣伏獄吏以示熒熒曰長卿誣伏則可燃豈敢誣證吏別摘熒尉仁和時所作詩有今作塵埃奔走人之句坐以怨望及應言上不言上遠竄武岡畧不自明公道宏開收寘臺省已而出使東廣節操彌厲凡舊例供饋積至數千緡潛輸公帑歸過曲江班擣郡縣吏之乏月給者和不違衆清不近名大率類此陛下自司業升之祭酒知其經明行脩諭宰臣云侍從闕亟用之會熒請祠優進右文殿

脩撰兩學生員祖道千計觀者太息按燬初除司業在
乾道五年八月家居一昔可至是時官已員郎供職滿
歲則六年冬祀法當任子燬逡巡踰時乃起遇郊不及
者兩旬又按祭酒從四品序位太常宗正祕書少列之
上燬疾未革少留累日必遷不然休致遺奏亦官二子
而燬前緩其來後果於去為子孫計者肯如是乎願錄
衆美還其恩數使天下知聖朝尊賢厲俗不間存闕書
之史冊足勸廉遜非創與也衆皆稱善惟公同年生給

事者難之衆自欲上奏或曰銀臺異論如格詔何衆
惘然而止其後上念公不已用其弟輝為八座公之諸
子遂有入官者此非天乎予為學官館職史官御史皆
未煖席公輒繼至為正字也公有呂虔贈刀之夢暨聞
公訃予復夢作文祭公覺而記其四句曲盡公德云君
子所恃而亦不比小人所畏而亦不忘此殆神交也今
公子邵武太守立言上高宰及等稟公易傳一卷詩四
卷奏議二卷表啓書劄論策記序雜著長短句共七卷

屬予為序惟公博通諸經尤長于易坎之象曰君子以
常德行習教事人多以治已治人為說公獨曰坎惟素
習則在險不失其常險至方習亦復何益故初爻獨云
習坎他爻曰坎而已雖然習當出險乃復入于坎窞者
為陰柔小才設也其論離卦九三曰日中必昃人生必
死當如曾參易簣子路結纓怡然死生之際嗟則惑惑
則凶矣即二者考公平生所謂非苟知之亦允蹈之者
歟至於他文正大而辭達詩篇醇粹而味永皆有德之

言也予故首陳兩朝聖鑒次列侍臣公論然後記予與
公親厚本末如元城劉忠定公序丞相忠肅公集過於
詳云嘉泰三年正月



文忠集卷五十四